



Broj: UP-I-KSI-09-39/23
Datum: 29.12.2023. godine

Na osnovu člana 25. stav (1) tačka a) i b), člana 32. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21) i člana 25. Poslovnika o radu Komisije za odlučivanje o sukobu interesa („Službeni glasnik Brčko distrikta Bosne i Hercegovine“, broj: 19/21), Komisija za odlučivanje o sukobu interesa, postupajući po službenoj dužnosti u predmetu utvrđivanja povrede odredaba Zakona o sprečavanju sukoba interesa u institucijama Brčko distrikta Bosne i Hercegovine od strane S. K., iz Brčkog, ulica [REDACTED] broj [REDACTED], člana Upravnog odbora Zavoda za planiranje, projektovanje i razvoj Brčko distrikta BiH, nosioca javne funkcije, na 75. sjednici, održanoj dana 29.12.2023. godine, donosi

RJEŠENJE

1. **UTVRĐUJE SE** da je S. K. iz Brčkog, ulica [REDACTED] broj [REDACTED] član Upravnog odbora Zavoda za planiranje, projektovanje i razvoj Brčko distrikta BiH, kao nosilac javne funkcije postupio protivno članu 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine, na taj način da u roku od 30 dana od dana stupanja na javnu funkciju, Komisiji za odlučivanje o sukobu interesa nije podnio izvještaj o imovinskom stanju nosioca javne funkcije.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, S. K. se shodno članu 39. stav (1) tačka b) Zakona izriče novčana kazna, i to obustavom dijela isplate neto naknade, koju nosilac javne funkcije prima za obavljanje javne funkcije u iznosu od 10% (deset posto) neto plate, odnosno naknade.

Obrazloženje

S. K. obavlja funkciju člana Upravnog odbora Zavoda za planiranje, projektovanje i razvoj Brčko distrikta BiH, a na osnovu odluke Skupštine Brčko distrikta BiH, broj: [REDACTED] od 20.09.2023. godine, te shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javnih funkcija i nosilaca javnih funkcija.

Uvidom u obavještenje i obrazac o javnoj funkciji i nosiocu javne funkcije-Aneks I, dostavljen Komisiji za odlučivanje o sukobu interesa od strane Zavoda za planiranje, projektovanje i razvoj Brčko distrikta BiH shodno članu 18. Zakona, utvrđeno je da S. K. kao

član Upravnog odbora Zavoda za planiranje, projektovanje i razvoj Brčko distrikta BiH stupio na javnu funkciju dana 26.09.2023. godine.

Članom 22. Poslovnika o radu Komisije za odlučivanje o sukobu interesa propisano je da je nosilac javne funkcije stranka u postupku.

Provjerom službene evidencije Komisije, odnosno Registra javnih funkcija i nosilaca javnih funkcija, kao i Registra o imovinskom stanju, utvrđeno je da S. K. do dana pokretanja postupka, odnosno 18.12.2023. godine, nije podnio Komisiji Izvještaj o imovinskom stanju na Obrascu o imovinskom stanju nosioca javne funkcije, bračnog i vanbračnog druga, djece i drugih članova domaćinstva kao i lica prema kojima nosilac javne funkcije ima zakonsku obavezu izdržavanja- Aneks II, odnosno propustio je da u roku od 30 dana od dana stupanja na javnu funkciju podnese Izvještaj o imovinskom stanju Komisiji.

Dana 18.12.2023. godine, Komisija za odlučivanje o sukobu interesa po službenoj dužnosti, zaključkom broj: UP-I-KSI-09-39/23 pokrenula je postupak protiv nosioca javne funkcije, S. K. iz Brčkog, člana Upravnog odbora Zavoda za planiranje, projektovanje i razvoj Brčko distrikta BiH, radi sumnje da nije Komisiji dostavio Izvještaj o imovinskom stanju na Obrascu o imovinskom stanju nosioca javne funkcije, bračnog i vanbračnog druga, djece i drugih članova domaćinstva kao i lica prema kojima nosilac javne funkcije ima zakonsku obavezu izdržavanja- Aneks II, čime je postupio protivno odredbama člana 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine.

Nosilac javne funkcije je istim zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana prijema zaključka.

Nakon prijema zaključka o pokretanju postupka, broj: UP-I-KSI-09-39/23 od 18.12.2023. godine, zaprimljen dana 26.12.2022. godine, S. K., član Upravnog odbora Zavoda za planiranje, projektovanje i razvoj Brčko distrikta BiH, dana 26.12.2023. godine, dostavio je Komisiji Izjašnjenje u kojem je naveo da zbog velikog obima posla nenamjernim propustom nije dostavio Komisiji Izvještaj o imovinskom stanju. Uz izjašnjenje dostavio je i Izvještaj o imovinskom stanju na Obrascu o imovinskom stanju nosioca javne funkcije, bračnog i vanbračnog druga, djece i drugih članova domaćinstva kao i lica prema kojima nosilac javne funkcije ima zakonsku obavezu izdržavanja- Aneks II, te je postupio shodno Zaključku Komisije.

Članom 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da je nosilac javne funkcije dužan u roku od 30 dana od dana stupanja na javnu funkciju podnijeti Komisiji Izvještaj za sebe i bračnog i vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda Zakona, s obzirom na to da je S. K., kao nosilac javne funkcije, propustio da u roku od 30 dana od dana stupanja na javnu funkciju člana Upravnog odbora Zavoda za planiranje, projektovanje i razvoj Brčko distrikta BiH, podnese Komisiji Izvještaj o imovinskom stanju na Obrascu o imovinskom stanju nosioca javne funkcije, bračnog i vanbračnog druga, djece i drugih članova domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, čime je postupio protivno gore navedenim zakonskim odredbama.

Član 38. Zakona propisuje kazne nosiocu javne funkcije koji postupi suprotno članu 19. Zakona o sprečavanju sukoba interesa u institucijama Brčko distrikta Bosne i Hercegovine, dok su članom 39. Zakona propisane novčane kazne nosiocu javne funkcije koji postupi suprotno odredbama člana 19. Zakona.

Komisija je, shodno članu 39. Zakona o sprečavanju sukoba interesa u institucijama Brčko distrikta BiH, prilikom odlučivanja o vrsti sankcije koju treba izreći u konkretnom slučaju u obzir uzela sve okolnosti kako bi izrečena sankcija odgovarala učinjenoj povredi Zakona. Komisija je cijenila činjenicu da je S. K. kao novoimenovani nosilac javne funkcije, a kako je naveo i u izjašnjenju, nenamjerno propustio da podnese u roku Izvještaj o imovini, činjenicu da je S. K. odmah po prijemu zaključka dostavio Komisiji Izvještaj o imovinskom stanju, odnosu imenovanog prema kršenju odredaba Zakona kao i opredijeljenosti imenovanog da postupi u skladu sa Zakonom, te otkloni razloge koji su ga doveli do kršenja Zakona, te je s tim u vezi odlučeno da se izrekne novčana kazna obustavom dijela isplate neto mjesečne plate, odnosno naknade, koju nosilac javne funkcije prima za obavljanje javne funkcije u iznosu od 10% (deset posto) neto naknade kako je to navedeno u stavu (2) izreke rješenja i da ista u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4. 25. i 39. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom u Brčko distriktu BiH.

Predsjednik
Komisije za odlučivanje o sukobu interesa

Admira Mujić, dipl. pravnik

Dostavljeno:

1. S. K., ulica [REDAKTIRANO] broj [REDAKTIRANO], [REDAKTIRANO],
2. Internet stranici Komisije,
3. Evidenciji i
4. Arhivi.